

Headlines

- 1 प्रधानमंत्री मुद्रा योजना दे 10 बर्रे मुकम्मल, प्रधानमंत्री मोदी होरें लाभार्थिं गी बधाई दिक्ती। जम्मू-कश्मीर मुद्रा योजना थमां लाहू ठोआने च सब्भनें शा अब्बल केंद्र शासित प्रदेश।
- 2 केंद्री गृह मंत्री अमित शाह होरें अज्ज श्रीनगर च उच्चि सतह दिएं बैठकें च जम्मू-कश्मीर दे सुरक्षा हालात, विकास परियोजनाएं ते अमरनाथे दी जात्तरा गितै तैयारिं दी समीक्षा कीती।
- 3 जम्मू-कश्मीर च त्रै होर संगठनें हुरियत दा लड़ छोड़ेआ, अमित शाह होरें इस कार्रवाई दा सुआगत कीता।
- 4 जम्मू-कश्मीर विधानसभा च विरोधी धड़ें दिएं पार्टिं स्पीकर हुंदे खलाफ अविश्वास प्रस्ताव पेश कीता।
- 5 केंद्री मंत्री डॉ. जितेंद्र सिंह होरें उधमपुर दे नत्थाटॉप च हिमालयाई क्षेत्र च पैहले-पैहले जलवायु केंद्र दी शुरूआत कीती।

<><><><><><>

PM Mudra Yojana

अप्रैल 2015 च शुरू कीती गेदी प्रधानमंत्री मुद्रा योजना नै अज्ज दस बरे पूरे करी लैते न। इस योजना दे 10 बरे पूरे होने पर अज्ज प्रधानमंत्री नरेंद्र मोदी होरें अपने आवास पर योजना दे लाभार्थिं कन्नै गल्लबात कीती। श्री मोदी होरें लाभार्थिं गी मुबारक दिंदे होई इस गल्लै पर जोर दिक्ता जे कियां इस योजना नै सुखने गी हकीकत च बदली दिक्ता ऐ। उनें दस्सेआ जे 33 लक्ख करोड़ रपे कोला मते पैहे गी बगैर कुसै गारंटी दे बंडुआ गेआ ऐ। प्रधानमंत्री होरें नौजवानें गी नौकरी तुप्पने आहलें दे बजाय आत्मनिर्भर रोजगार पैदा करने आहलें च तब्दील करने च योजना दी भूमिका पर बी जोर दिक्ता।

<><><><><><>

JK Mudra

प्रधानमंत्री मुद्रा योजना दा जम्मू-कश्मीर च इक महत्वपूर्ण असर पेआ ऐ। इस योजना च कीते गेदे कर्ज वितरण च जम्मू-कश्मीर बाकी सब्भनें केंद्र शासित प्रदेशें कोलां अगगे ऐ। एहू योजना भलेआं लौहके ते लौहके उद्यमें गी 20 लक्ख रपे तगर दे गारंटी मुक्त कर्ज प्रदान करदी ऐ जेदे कन्नै उद्यमी विकास गी बढ़ावा मिलदा ऐ। स्हाड़े जिला संवाददाताएं कन्नै गल्ल करदे होई इस योजना दे किश लाभार्थिं अपने अनुभव सांझे कीते।

<><><><><><>

HM-Meetings

केंद्री गृह मंत्री अमित शाह होरें अज्ज राजभवन श्रीनगर च इक्क उच्ची सतह दी बैठक दी अध्यक्षता करदे होई जम्मू-कश्मीर च जारी बक्ख-बक्ख विकास परियोजनाएं दी प्रगति ते रफ्तार दा जायजा लैता। बैठका च उपराज्यपाल मनोज सिन्हा ते मुखमंत्री उमर अब्दुल्ला होर बी मौजूद हे। उन्दे अलावा केंद्र सरकार ते प्रदेश प्रशासन दे केई सीनियर अफसरें बी इस बैठका च शिरकत कीती। गृह मंत्री होरें जम्मू-कश्मीर प्रशासन गी चेचे तौरा पर आखेआ कि ढांचागत विकास, सैलसफा गी बढ़ावा देने, प्रदेश दे दूर-दरेडे इलाकें तोड़ी सखल्ली पुज्ज लेई राबता ते कल्याणकारी स्कीमें दी असरदार अमलावरी गी यकीनी बनाने बक्खी चेचा ध्यान दित्ता जा। उनें जम्मू-कश्मीर दे सामे ते पूरे-पराते विकास गितै केंद्र सरकार दे धेइयै गी फी पक्का कीता। गृह मंत्री होरें जम्मू-कश्मीर दे सुरक्षा हालात बारै बी इक बैठक दी बी अध्यक्षता कीती। एहदे कन्नोकन्नी उनें इस बरे 3 जुलाई गी शुरू होआ करदी श्री अमरनाथ जी दी सलाना जात्तरा गितै तैयारिएं ते सुरक्षा बंदोबस्तें दी बी समीक्षा कीती।



HM-J&K Hurriyat Groups

जम्मू-कश्मीर च 3 होर संगठनें अलगाववादी हुर्रियत कांफ्रेंस थमां अपने आपै गी बक्ख करी लैता ऐ। इनें संगठनें च जम्मू-कश्मीर इस्लामिक पालिटीकल पार्टी, जम्मू ते कश्मीर मुस्लिम डेमोक्रेटिक लीग ते कश्मीर फ्रीडम फ्रंट शामिल ना। इक्क सोशल मीडिया पोस्ट च केंद्री गृह मंत्री अमित शाह होरें इस गैं दा सुआगत कीता। उनें आखेआ जे एहू भारत दे संविधान च लोकें दे भरोसे गी मजबूत रूपै कन्नै दर्शादा ऐ। हुनै तगर 11 संगठनें अलगाववाद कोला अपने आपै गी दूर करी लैता ऐ।

No Confidence Motion

जम्मू-कश्मीर विधानसभा च विरोधी पार्टियों जिंदे च पीपल्स डेमोक्रेटिक पार्टी-पीडीपी ते पीपल्स कांफ्रेंस बी शामिल न, अज्ज स्पीकर अब्दुल रहीम राथर हुंदे खलाफ अविश्वास प्रस्ताव जमा कराया। एहू अविश्वास प्रस्ताव स्पीकर हुंदे आसेआ वक्फ संशोधन बिल 2025 पर चर्चा करोआने दी मंग गी खारज कीते जाने गी लेइयै जमा कराया गोआ ऐ। विरोधी धड़ें दा दावा ऐ जे स्पीकर हुंदे इस फैसले कन्नै बड्डे पैमाने पर रौह-रौस्सा फैली गोआ ऐ। आकाशवाणी दे जम्मू संवाददाता नै जानकारी दिती ऐ जे प्रस्ताव पीपल्स कांफ्रेंस दे अध्यक्ष सज्जाद लोन होरें जमा कराया जिस्सलै जे पीडीपी दे विधायकें जिंदे च वहीद उर रहमान पर्रा, मीर मोहम्मद फैयाज ते रफीक अहमद नाइक बी उन्दे कन्नै हे। दायर इस प्रस्ताव अर्जी च स्पीकर होरें गी हटाए जाने दी मंग कीती गेदी ऐ, इस बिनाह पर जे उनें स्थगन प्रस्ताव पर चर्चा कराने दी मंग गी खारिज कीता ते विरोधी पार्टिएं आसेआ आंदे गेदे प्रस्ताव गी स्पीकर करने शा ना करी दिती।

Waqf-LA

पी.डी.पी विधायक वहीद उर रहमान परां होरें गी वक्फ संशोधन अधिनियम दे खलाफ नमें प्रस्ताव दी मंग चुक्कने परेंत अजज विधानसभा शा बाहर करी दित्ता गेआ। आकाशवाणी दे जम्मू संवाददाता दी रिपोर्ट मूजब विधानसभा च वक्फ मुद्दे पर लगातार दुए ध्याड़े हंगामा होआ जेदे चलदे स्पीकर अब्दुल रहीम राथर होरें सदन दी कार्रवाई दो बारी स्थगित करी दित्ती। स्पीकर होरें वक्फ संशोधन कनून पर चर्चा करने आस्तै स्थगन प्रस्ताव गी खारिज करने दे अपने फैसले दा घड़ी-घड़ी बचाऽ करदे होई आखेआ जे संसद आसेआ पैहलें शा गै कीते गेदे फैसले गी रद्द करना मुमकन नेई ऐ।

<><><><><><>

Nathatop Climate Centre

हिमालयाई खेत्तर च इक कुल संसारी सतह दी पैहल दे तौरा पर केंद्री विज्ञान मंत्री डॉ. जितेंद्र सिंह होरें अज्ज उधमपुर जिले दी चनैनी इलाके दी नत्थाटॉप थाहर उच्चाई आहले इलाके दे पैहले-पैहले जलवायु केंद्र दी शुरूआत कीती। इस पैहल दा मकसद मती उच्चाई आहले इलाके च अध्ययन ते अनुसंधान दे कन्नोकन्नी मौसम दे बारै च सटीक जानकारी उपलब्ध कराना ऐ।

<><><><><><>

Flower Show Udh.

उधमपुर जिला प्रशासन कल्लै थमां शुरू होआ रदे फुल्लें सरबन्धी मेगा फ्लावर शो दी मेजबानी करने आस्तै पूरी चाल्ली तैयार ऐ। द'ऊं ध्याड़ें तगर चलने आहला एहू शो जखैनी पार्क उधमपुर च आयोजित कीता जा'रदा ऐ। इस कार्यक्रम च बक्ख-बक्ख किस्में दे फुल्लें दा इक शानदार प्रदर्शन होग जेदे कन्नै कुदरत दी खूबसूरती गी इक्क बड़े गै शैल तरीके कन्नै पेश कीता जाग। जिला उधमपुर दियां डिप्टी कमिशनर सलोनी राय होरें इस शानदार कार्यक्रम गी दिक्खने आस्तै लोकें गी साद्दा दित्ता ऐ।

<><><><><><>

Poonch Annual Credit

जिला प्रशासन पुंछ नै 2025726 आहले माली बरे लेई सलाना दोआर योजना गी अधिकारिक तौरा पर मुकदा रूप देई दित्ता ऐ, जेदे च जिले लेई 800 करोड़ रपे दा लक्ष्य मित्थेआ गेदा ऐ। एहू घोषणा पुंछ दे डाकबंगले च लग्गी दी बैठक दौरान कीती गेई जेदे च पिछले बरे दी योजना तैहत होए दे कम्में ते कारकर्दगी पर तफसीली चर्चा कीती गेई। एहूदे अलावा सरकार दिएं एल्लै चला करदिएं केई स्कीमें दी बी समीक्षा कीती गेई।

<><><><><><>